



KEMENTERIAN WILAYAH PERSEKUTUAN  
Aras G-7, Menara Seri Wilayah, Presint 2, 62100 Putrajaya  
Tel: 03-8889 7888 Faks: 03-8889 7957  
Laman web: [www.kwp.gov.my](http://www.kwp.gov.my)

---

# SIARAN MEDIA

## UNTUK LIPUTAN MEDIA MASSA

### KEMPEN KIBAR BENDERA WILAYAH PERSEKUTUAN SEMPENA SAMBUTAN HARI WILAYAH PERSEKUTUAN TAHUN 2015

**KUALA LUMPUR, 4 Januari 2015** – Dataran DBKL hari ini dibanjiri oleh sekurang-kurangnya 3000 warga kota yang menyertai Kempen Kibar Bendera Wilayah Persekutuan Sempena Sambutan Hari Wilayah Persekutuan 2015 yang bermula seawal 6.30 pagi. Program ini diadakan bersekali dengan KL Car Free Morning yang disempurnakan oleh YB Datuk Seri Utama Tengku Adnan bin Tengku Mansor, Menteri Wilayah Persekutuan.

2. Kempen Kibar Bendera diadakan sempena Sambutan Hari Wilayah Persekutuan 2015 (SHWP 2015) yang disambut pada **1 Februari** setiap tahun dianjurkan bertujuan untuk menyemarakkan semangat mengibarkan bendera Wilayah Persekutuan dan juga dapat menyemai semangat cintakan Wilayah Persekutuan. Tema sambutan Hari Wilayah Persekutuan pada tahun ini adalah “**Wilayahku Ceria**”. Ia berasaskan kepada *sense of belonging* di Wilayah Persekutuan, perpaduan yang dibina bagi memupuk toleransi antara satu sama lain dan tema ini juga mengaspirasikan Wilayahku dengan persekitaran kejiranan komuniti Wilayah Persekutuan yang ceria, bersih dan indah serta bersih daripada unsur-unsur yang menggugat keharmonian dan kesejahteraan warga Wilayah Persekutuan.
  
3. Kempen Kibar Bendera Wilayah Persekutuan telah diadakan selama 9 tahun bermula sejak Bendera Wilayah Persekutuan diwartakan oleh Seri Paduka Baginda Yang di-Pertuan Agong XII pada 20 Ogos 2006. Sempena majlis ini juga, semua bangunan dan kemudahan di sekitar Kuala Lumpur juga tidak ketinggalan dalam mengibarkan bendera Wilayah Persekutuan seperti pemasangan bendera gergasi di bangunan DBKL, pemasangan bendera di bangunan komersial di Kuala Lumpur dan pemasangan bendera di 350 tiang-tiang lampu di sekitar Bandaraya Kuala Lumpur.

4. Untuk tahun 2015, Kempen Kibar Bendera Wilayah Persekutuan Peringkat Kuala Lumpur diadakan secara *joint program* KL Car Free Morning oleh DBKL. Program KL Car Free Morning ini telah diadakan sejak Januari 2014 di atas inisiatif YBhg. Datuk Bandar Kuala Lumpur. Manakala Kempen Kibar Bendera Wilayah Persekutuan Peringkat Putrajaya akan diadakan secara *joint program* Langkah Ceria oleh Perbadanan Putrajaya (PPj) dan Kempen Kibar Bendera Wilayah Persekutuan Peringkat WP Labuan akan diadakan pada 18 Januari 2015. KL Car Free Morning diadakan pada pagi hari Ahad minggu pertama setiap bulan. Semasa program ini berlangsung, kenderaan bermotor seperti kereta, motosikal, van, lori dan bas tidak dibenarkan memasuki beberapa jalanraya utama di Kuala Lumpur. Laluan yang akan digunakan untuk program ini adalah Jalan Raja Laut, Jalan Tuanku Abdul Rahman, Jalan Sultan Ismail, Jalan Pinang dan berpatah semula sehingga di Dataran DBKL. Tujuan program ini adalah untuk memastikan penduduk di WP Kuala Lumpur dapat menjalankan cara hidup yang sihat dan ceria.

5. Melalui program ini, diharapkan penduduk di Wilayah Persekutuan dapat menjalankan cara hidup yang sihat dan ceria. KWP dan YB Menteri berharap supaya ikatan kekeluargaan dan semangat kebersamaan dapat dikenalkan dan semoga program yang baik seperti ini ditambahbaik dengan penglibatan lebih ramai peserta dan NGO's dalam menjadikan Bandar raya Kuala Lumpur bandar raya yang sihat dan ceria.

6. Melalui Kempen Kibar Bendera ini diharapkan agar nilai-nilai murni seperti rasa sayang atau '*sense of belonging*' kepada Wilayah Persekutuan di kalangan warga Wilayah Persekutuan akan dapat disemai dan dipupuk bagi mencapai matlamat membangunkan bersama kecemerlangan dan kegemilangan Wilayah Persekutuan sebagai sebuah Wilayah Persekutuan yang Maju dan Sejahtera. Diharapkan juga program ini dapat memberi impak yang besar dalam penglibatan rakyat secara umum serta memberi peluang kepada mereka untuk menyertai setiap aktiviti dan program yang dianjurkan bagi memeriahkan Sambutan Hari Wilayah Persekutuan 2015.

**Disediakan oleh:**

**BAHAGIAN KOMUNIKASI KORPORAT  
KEMENTERIAN WILAYAH PERSEKUTUAN  
Kuala Lumpur  
4 Januari 2015**